

No Servus, Diener und Habe die Ehre!

Etze kummt dos

Nej su wos

vu Sömde, n 23. Oktoubr 2021



Helmut Steffan

Feierroubd ös

Dar döttsche Corona-Lockdown hout sehr vill ei dr Wörtschft ollgemejn und ou an Gelände andersch warn lossn. De Leute bestelln ofte bei grußn Vrsandgeschäftn, wall jo de klenn Lodn om Urte zumachn musstn. Wie schiene worsch ock die Juhre an Gelände. Mr hottn ejfoch olles dou, wos mr zun Labn brauchn tote. Wie ich ei Gedankn su dorch de Stroußn spoziert bie, kom ich zun Nouchdenkn.

Mr hottn salt sechs Bäckn und enn Zockerbäckn, acht Flejscher, unsn ejgnen Isergebörigs-Verlag, vrtejl't iebr n Urt klejne Labnsmöttlgeschäfte vu „B“ wie Brückner iebr Konsum bös „Z“ wie Zenkner. Drei Kouhlnhändler hotten ihre Lougerschoppn tirekt o s ahle Bohnglejs gebaut, und obzwor winger Auton wie heute of dan Stroußn gefohrn sein, fondn bis zu zahn Tankstelln ihr Auskumm. Tut ock amoul nouchdenkn, wu salt ieberole an Gelände Pengsin zu kejfn wor!

An Schreibstubn lejft heute vill „digital“. Frieher konntn de koufmännischn Ogestalltn ihr Zeug ei Fachgeschäftn öm de Ecke beschoffn: Denkn mr ock o Nom wie Popier Blaschke, Unger, Bicher-Wenzel odr de Werz-Filialn om Morchte. Mit Wehmut denke ich moichmoul ei ar ruhichn Stunde o de „gude ahle Zeit“ zoröcke. S wor halt die Zeit vu n Ofange ei dr Nut bös hie zun ofte zitiertn Wörtschoftswunder.

Obr wos ös aus dar gudn ahln Zeit noch ieberlej gebliebn? Unsr Postomt mit a poor Brief- und an Päcklschalter hon se ufgeliest. Gosthäuser wie de Hittnschenke sein weggerössn. Bei Wundrakn ei dr „Wahrheit“ göbt s indische Kost, dr Gablinzer Hof hout senn Nom egebisst und nouch dr Diskotheknzeit denkt bei dan zwee neuen Lokaln dorte bale kenner mieh dro, doss außer dan Wörtshause a Bäcke, a Flejscher, ane Post und de Polizei drönne worn. Ganz on Ofange wor dorte sugor de Praxis vun Zosche-Dochter. Die Ära ös etze nouch zwej Generatioun ou zu Ende - dr Zosche-Dochter junior tote mit neununsechzsch Juhn seine Praxis ufliesn, weil ha noch a bössl wos vu senn Ruhestande genissn wöll.

Mr kennte ei s Lamentiern kumm. S tut schunt wieh, wenn Traditionnsfirmen wie Fiedler ufhiern. Wu göbt s denn etze noch die extravagantn Präsentkörbe odr enn Neugablinzer Sekt odr ane Riediger-Tschokolade zu kejfn? Sehr Horte tröfft enn ou s Betriebsende vu n Posselt-Bäckn. Wie ha uf enn Zedl o dr Lodntiere schreibt, hout a Gablinzer Traditionns-Betrieb - und unser letzter Bäcke - nouch iebr hundert Juhn sei Ende gefundn. Hoffntlich giehn die Rezepte frn Kleckslkuchn, fr Pottrwöschl, Chröstbrut odr Moubuchte ne ganz verlurn! A Labn ohne Pottrwöschl, Kleckslkuchn und Moubuchte ös halt toch ock noch de holbe Frejde und Weihnachtn ouhne Chröstbrut kon mr sich schun gor ne vierstalln. Mejnt dr ne ou?
